

# Malaysia terus unggul carta pingat

VIENTIANE - Malaysia menambah enam lagi pingat emas untuk menjadikan 15 emas keseluruhan dipungut, sekali gus meletakkan kontinjen negara kekal mengungguli kedudukan teratas senarai pingat pada hari ketiga Sukan Universiti ASEAN (AUG) 2012 di sini, semalam.

Olahraga menjadi penyumbang pingat terbesar semalam apabila menggondol empat emas, sementara terjun dan karate, masing-masing memperoleh satu pingat

emas.

Acara terjun yang berakhir, semalam menutup saingan dengan menambah satu lagi emas melalui Cheong Jun Hoong menerusi acara 3 meter papan anjal di Pusat Akuatik, Kompleks Sukan Nasional. Kejayaan atlet berusia 22 tahun itu bermakna Malaysia menyapu bersih kesemua empat pingat emas yang dipertandingkan.

Dalam acara tersebut, Jun Hoong yang mengumpul 340.05 mata diberi tentangan rakan senegara,

Wendy Ng Yan Yee yang merangkul perak setelah mencatat 312.40 mata meninggalkan wakil Indonesia, Sari Ambarwati Suprihatin sekadar berpuas hati dengan pingat gangsa (253.85 mata).

Jun Hoong ketika ditemui pemberita berkata, keputusan yang dicatatnya amat bagus dan mempamerkan aksi konsisten untuk meraih mata yang baik pada tujuh terjunan yang disempurnakan, semalam.

"Saya cuba diberi saingan oleh Wendy, saya perhatikan dia sema-

kin meningkat. Kedua-dua kami mempamerkan tahap terjunan yang tinggi. Saya terpaksa berusaha keras tadi untuk memastikan kemenangan menjadi milik saya," kata penuntut Universiti Putra Malaysia itu.

Sementara itu, di gelanggang karate, Malaysia menutup saingan dengan menambah satu lagi emas dan perak melalui karate kumite berpasukan wanita serta lelaki.

Untuk aksi berpasukan wanita, Malaysia yang diwakili peserta adik-

beradik, M.Mathivani dan M. Yokananthini menundukkan Vietnam di pentas final bagi memenangi emas, sementara skuad lelaki yang dibarisi, T. Govindasamy, L. Kunasilan serta Mohd. Hatta Mahamut sekadar meraih perak setelah tewas kepada lawan dari negara yang sama.

Tenis turut menyumbang pingat perak dalam acara berpasukan wanita setelah tewas 0-2 kepada Thailand pada perlawanan akhir, semalam. - UTUSAN

## Kedudukan pingat

Negara	Emas	Perak	Gangsa	Jumlah
<b>MALAYSIA</b>	<b>15</b>	<b>12</b>	<b>16</b>	<b>43</b>
Vietnam	14	13	9	36
Thailand	10	12	15	37
Laos	10	7	15	32
Indonesia	3	8	21	32
Filipina	2	3	3	8
Singapura	1	0	8	9
Kemboja	0	0	4	4
Brunei	0	0	2	2
Myanmar	0	0	1	1
Timor-Leste	0	0	1	1

\*Keputusan setakat 8 malam waktu Malaysia